

摘藻堂四庫全書薈要

集部

欽定四庫全書薈要

集部

中州集卷八



詳校官候選知縣臣吳甸華

欽定四庫全書薈要卷二萬八十一集部

中州集卷八

辛集

金元好問輯

邢內翰具瞻一首

具瞻字嵩夫遼西人天會二年進士與吳蔡為  
文章友仕至翰林待制

出塞

樓外青山半夕陽寒鴉翻墨點林霜平沙細草三千里

一笛西風人斷腸

王太常繪一首

繪字質夫濟南人天會二年進士武陟道中詩  
云梧葉重勝迎日露蕎秧薄要護霜雲人頗稱  
之仕至太常卿有注太白詩行於世

江天秋晚圖

萬頃波間踏浪兒瀟湘秋晚趨歸時四山紅葉風聲健  
散入儂家欸乃詞

王禮部競一首

競字無競安陽人宋末登科仕國朝至禮部尚  
書兼翰林學士承旨年六十四大定四年卒無  
競善作大字字或廣長丈餘而結密如小楷京  
都宮殿題榜皆其筆趙禮部以為古今第一手  
唯党篆差可配耳一孫名道通字彥深今為黃  
冠師

奉使江左讀同官蕭顯之西湖行記因題其後

雲煙濃淡費臨摹行記看來即畫圖雲夢不妨吞八九  
筆頭滴水了西湖

杜佺一首

佺字真卿武功人宋末有詩名於闕中兒時嘗  
作藥名詩有杜仲吾家好弟兄自然同姓又同  
名之句及以五言百韻上乾州通判馬涓涓大  
加賞異阜昌中登科蒞官亦有聲焉鬼太真墓  
過客多題其詩甚多道陵詔錄其詩得五百餘

首付詞臣第之真卿詩在高等舊有錦溪集亂  
後不復見矣子師楊亦能詩尤工書翰奉天楊  
煥然云然

馬嵬道中

垂柳陰陰水拍堤春晴茅屋燕爭泥海棠正好東風惡  
狼籍殘紅送馬蹄

邊轉運元勳

二首

元勳字輔臣豐州人後遷雲中祖貫道遼日狀

元輔臣天會十年進士終於河間路轉運使與

弟元鼎元恕

闕

望瀛臺春望

晴雲如因柳如癡丹杏開殘碧草齊一派望瀛臺下水  
暖風遲日浴鳬鷺

七夕

高樓人散酒罇空漫擬新文送五窮獨倚南窗夜岑寂  
一鈎涼月下疎桐



李寧州之翰 四首

字周卿濟南人宣和末擢第人有勸叅童貫可  
以徑至館職者周卿謝絕之國兵破洺州縛見  
元帥誘之使降語及君臣之際辭情慷慨自分  
一死帥怜之遂被錄用後守寧州陷田侍郎珏  
黨籍除名徙上京遇赦復官終于東平卒有漆  
園集行於世子靈石尉謙孫德元今在鄉里

書呈仲孚

造物固難量誰能計寒餓失馬乃為福夢牛翻作禍長  
溪霜練靜脩嶺蒼龍卧魂夢吾已安不勞歌楚些

題密雲州學壁

崎嶇到此興何堪况復風謠意未諳旅舍蕭條空自遣  
胸懷磊落向誰談留連暮雨侵疎牖宛轉飛雲掃翠嵐  
因憶林泉歸去好一燈幽夢遶春潭

中京遇因長老

天涯流落偶生還古剎相逢語夜闌歎我歸途千里遠

喜君禪榻一身安  
松聲不斷風吟細  
月影無邊露氣寒  
分手山堂更寥索  
冷雲衰草伴征鞍

歲莫

休怪年來白髮新  
天涯三載困埃塵  
偶離沙磧窮陰地  
收得桑榆老病身  
對雪莫吟秦嶺句  
潑醅且醉漢江春  
此生自斷無餘事  
何必區區問大鈞

三興居士一首

三興居士阜昌中人

題平陰僧寺

三吳家近水晶宮  
行坐紅香綠影中  
今日異鄉僧寺裏  
一盆荷葉戰西風

楊興宗一首

興宗高陵人  
宋既渡江  
故興宗有龍南集予同舍郎楊君羨嘗見之

出劍門

嘔啞鳴鵞下長川  
萬疊青峰只眼前  
山鷗啄殘紅杏粉

杜鵑啼破綠楊煙夢迴蜀棧雲千片醉枕巴江月一船  
物色誰分杜陵老風騷牢落劍南天

趙亮功一首

亮功華州人嘗監富平酒

甘露寺

鄭南峰下寺泉石間疎篁飛雨度山閣閒雲生野塘簷  
前松子落厨際柏烟香別後聞鐘磬山陰空夕陽

賈泳一首

咏字漢甫洛陽人

題安生僧寺 天會己酉余嘗與王化原李端中

同過是寺屬兵厄甫罹堂宇頽弊繪素剝落秋草  
野蔓羅生堦上盤桓終日間聞其無聞時風塵未  
靜竊謂此地當日就丘墟及今與端中復來則寺  
有僧簡師矣向之所見頽者已完茸剝者復嚴潔  
鐘閣巍焉石塋歸焉庭樹鬱焉皆向之所未有者  
也因一讀舊題已經五稔自念五年之間所向齟

齟十步九蹶卒陷機穽豈非禍患之來有積漸歟  
抑得失行止非人所能為歟嗚呼事去如夢人生  
如寄窮達相推雖賢智有不能免焉者顧余何足  
道哉所不知者他日過此寺之興廢余之得喪悲  
歡又何如也續題一詩貽失路者共為一歎云癸

丑七月八日題

重來已是五年游憂患相仍欲白頭翻羨亭亭兩奇樹  
不知風雨過春秋

元日能一首

日能不知何許人與劉崑老同時

紅梅

天上瓊兒白玉肌吳妝畧約更相宜認桃辨杏由君眼

自有溪風山月知

崑老同賦云一點清香透雲雪是中  
那得杏花天評者謂二詩同意而日

工能為

范墀一首

墀字元涉系出潁川有詩話行于世



和高子初梅

春風也自惜流光只放寒梅一樹芳  
玉粉更粧前夜雪  
口脂猶注昔年香  
江湖昨夢誰同寄  
詩酒風流豈易忘  
東閣何郎未全老  
花枝休笑鬢絲長

王雄州仲通一首

仲通字達夫長慶人天會六年進士皇統中陷  
田珏黨籍編配五國會赦還世宗即位復官終  
于永定軍節度使

送客

措足疑無地，捫心幸有天。  
故人成解后，殘喘見哀憐。  
落日驚寬外，孤雲淚眼邊。  
西歸萬里夢，今夕到君船。

韓內翰汝嘉一首

汝嘉字公度，宛平人。父昉，遼末狀元，仕國朝至宰相，嘗作武元聖德神功碑，為作者所稱。公度皇統二年進士，累遷真定路轉運使，坐公事遷清州防禦使，召為翰林侍讀學士，卒。

寄元真同年

十年塵土鬢毛斑杖屨還來踏故山  
葉寄殘紅春尚在雲酣濕翠雨仍慳  
不堪倚樹追前事更恐臨溪見病顏  
一日暫來千日去何時倦鳥得真還

王吏部啓一首

啓字希畢大興人正隆二年進士累遷戶部員外郎通州刺史用宰相萬公薦權右司郎中章宗即位不一歲遷工部侍郎即以河南北路提

刑使拜吏部尚書使宋使還出為絳陽軍節度  
使致仕還鄉里與左丞董公叅政馬公宣徽盧  
公尚書鄆公為九老會年七十九卒子師揚字  
仲雄南渡後隱居崧山時年已六十餘經傳子  
史皆手自抄之如健舉子結夏課然希顏說仲  
雄在太學同舍號為閉戶王先生其謹厚蓋家  
法云孫造字成叔今居東平

王右轄許送名酒久而不到以詩戲之

燕酒名高四海傳  
兵厨許送已經年  
青看竹葉應猶淺  
紅比榴花恐更鮮  
枕上未消司馬渴  
車前空墮汝陽涎  
不如便約開東閣  
一看長鯨吸百川

晁洗馬會一首

會字公錫高平人  
道院文元公之後  
宣和末中武舉仕  
為太子洗馬天眷  
二年經義進士為  
人美風儀氣量宏  
博澤人經靖康之  
亂生徒解散公錫  
稍誘進之貧不能  
就舉者必厚為津  
遣在

官下則分俸以給之至于李承旨致美昆仲亦  
出其門士論歸焉歷虞鄉猗氏臨晉三縣令以  
興平軍節度副使致仕年七十八終於家詩號  
泣水集虞鄉縣齋云官況薄於重榨酒瓜期近  
似欲殘碁王官谷云煙藏芳樹遠雲補斷山齊  
鄉人至今傳之孫國章字公憲李承旨外孫教  
授鄉里樂於提誨諸生經指授者肅然如在官  
府進退拱揖皆有可觀蓋其家法云

杜鵑

杜宇啼聲枕上來一聲哀似一聲哀千哀萬怨無今古  
喚得行人若箇迴

王內翰導古 二首

導古字元仲父政金吾衛上將軍三子導仁導  
義元仲其季也元仲四子庭玉字子溫內鄉令  
終於同知遼州軍州事庭堅字子真有時名庭  
筠字子端庭挾字子文

過太原贈高天益

天益能作大字

遼海渺千里風塵今二毛  
心雖如筆正官不稱才高  
筦庫非君事山林必我曹  
相期老鄉國拂石弄雲璈

野菊

子真

鬪雞臺下秋風裏  
白白黃黃無數花  
日莫城南城北道  
半隨榛棘上樵車

王汾州璫二首

璫字君玉太原人天眷二年進士弟珙器玉珣



汝玉皇統九年同榜家世業醫有陰德聞里中  
嘗有金蠶金馬之瑞君玉仕至汾陽軍節度使  
鄉人榮之號三桂王氏行尚書省左右司郎中  
仲澤其從孫也金馬在部掾清卿房迄今寶之  
游太寧寺

西山踏破萬層青與客攜壺上太寧泉石有情容避俗  
軒裳無術可逃形雲縈屋角僧禪靜露下松梢鶴夢醒  
明日却尋塵境去曉猿啼月若為聽

王元仲海岳樓同諸公賦

汝玉

十二朱欄倚半空  
元龍高卧定誰雄  
簷楹翠濕蓬山雨  
枕簟涼生弱水風  
物色橫陳詩卷裏  
雲濤飛動酒杯中  
謫仙會有騎鯨便  
八極神游路可通

李特進獻可

二首

獻可字仲和遼東人太師金源郡王石之子太  
師遼末狀元仲和世宗元妃之弟大定十年史  
紹魚榜進士歷州縣入翰苑累遷戶部員外郎

以事貶清水令召為大興少尹遷戶部侍郎終  
於山東東西路提刑使衛紹王即位以仲和元  
舅贈特進道國公子道安特旨符寶郎

清水寒食感懷

桃花零亂柳成陰人到春深思更深芳草成樓天不盡  
異鄉寒食故鄉心

召還過故關山

過關天日正晴明誰道山神不世情遠客得歸心緒別

隴隴閒作斷腸聲

雷溪先生魏道明 二首

道明字元道易縣人父遼天慶中登科仕國朝  
為兵部郎中子上達元真元化元道俱第進士  
又皆有詩學元道最知名仕至安國軍節度使  
莫年居雷溪自號雷溪子有鼎新詩話行於世  
元道春興云燕來燕去烏衣巷花落花開穀雨  
天高麗館偏涼亭云

涼或作梁

碧海半彎蝸角國春

風十里鴨頭波中秋云丹桂知經幾寒暑冰壺  
別是一山川其所得者也

佛嵒寺

虎谷西垠北口南橫橋過盡見松庵舊遊新夢猶能記  
般若真如得徧參霜圃擷蔬充早供石泉煮茗薦餘甘  
殘年便擬依僧住過眼空花久已諳

退食

竿頭擯鼻清貧在夢裏槐安舊習空退食歸來澹無事

水邊長嘯看晴虹

學易先生雷思一首

思字西仲渾源人天德三年進士大定中任大理司直持法寬平至今稱之仕至同知北京轉運使事有易解行於世弟志字尚仲亦第進士仕至永定軍節度使西仲季子淵最知名

食松子

千嵒玉立盡長松半夜珠璣落雪風休道東游無所得

歲寒梁棟滿胸中

王大尹脩一首

脩字脩然范陽人皇統二年進士資稟鯁峭甫  
入仕即以材幹稱大定中皇子曹王尹大興脩  
然為少尹王移鎮北門復以同尹從之前後多  
所規益朝廷稱焉遷咸平轉運使改知瀋州坐  
為怨家所誣奪官宰相有為辨理者得鄭州防  
禦使章宗即位召拜禮部尚書以選為大興尹

兩月政成發姦擊強剖繁理劇百年以來無有  
出其右者尋為護前者所排繫獄累月天子知  
其非罪出之脩然幅巾歸范陽明年起為定國  
軍節度使致仕卒遺命無請謚無立碑然至今  
言名臣者必及焉

烏子秀自左司員外郎左遷上京幕官

楚山白玉點蠅頭正坐胸中有九流同是吏郎皆五馬  
不知山鬼解揶揄



高工部有鄰一首

有鄰字德卿遂城人數歲入小學州將為子娶  
婦驂御盈路同舍兒競觀之德卿讀書自若也  
大定三年第進士歷州縣為尚書省令史時相  
議詘詞賦專明經德卿以賦有譎諫之義反復  
詰難竟得不罷爾後擢第者廷試時務策亦自  
德卿發之明昌初累遷安國軍節度使父飛狐  
令某嘗尉南和以公事活千餘人德卿實生是

邑父老有身及當時事者扶杖迎勞歡呼馬前  
德卿亦為立碑尉廳不踰月子嵩猶子鑄同榜  
登科時人榮之泰和中使宋還拜工部尚書致  
仕卒德卿孝友廉介長於吏事所至興學校敦  
風化以儒雅自緣飾耆舊至今稱之子嵩字士  
瞻第進士季子嶷字士美正大初監察御史最  
知名

馬嵬

事去君王不柰何  
荒墳三尺馬嵬坡  
歸來枉為香囊泣  
不道生靈淚更多

宋孟州楫二首

楫字濟川長干人年十九天德三年擢第除著作郎母老丐歸養許之泰和三年以省掾從吏部尚書梁肅使宋副趙王府長史直臣獵淮上射一虎斃之濟川有詩記其事語意俊拔泗州守刻石於鎮淮堂濟川官至孟州防禦使子元

吉字祐之明昌二年進士元圭字達之泰和三  
年進士皆有名於時曾孫弘道今在武陟

還紫雲寺素扇且題詩其上

吳綾便面小團團失手拈來亦厚顏  
障盡驛塵三十里却還明月紫雲間

庭槐

庭槐先人手所植再世清陰方滿臺  
慚媿兒孫種桃李花枝準擬當年開

高轉運德裔一首

德裔字曼卿鶴野人高才博學弱冠擢第累遷  
登聞檢院同知太府少監平陽少尹開州刺史  
豐王傅卒於西京路轉運使工於為文字畫尤  
有法所題卷軸今猶有存者嘗以樗軒所書比  
之氣韻形似無毫髮少異樗軒自望者甚高何  
至學曼卿乃暗合之真異事也子元道殿中侍

御史

坐亡女

女環州張氏年十三異夢之後  
坐亡已四年矣贈詩者甚多

結習銷來性自圓去留元不問人天  
消搖自是忘形蝶  
枯寂寧同委蛻蟬無礙真空常蕩蕩  
若存餘息尚綿綿  
立亡坐脫皆遊戲定力何嘗有變遷

路冀州仲顯一首

仲顯字伯達冀州人家世寒微其母有賢行教  
伯達讀書國初賦學家有類書名節事者新出  
價數十金大家兒有得之者輒私藏之母為伯

達買此書搏衣節食累年而後致戒伯達言此  
書當置學舍中必使同業者皆得觀少有靳固  
吾即焚之矣伯達正隆五年進士明昌初授武  
安軍節度使鄉人榮之雲朔用兵伯達奉使江  
左還獻賜幣以佐軍未報而伯達死章廟詔以  
所獻還其家夫人傅氏曰此非吾夫意復上之  
有司不聽夫人付之州學買上田二千畝有奇  
以贍生徒故相馬琪德玉時判州事聞于朝賜

號成德夫人伯達二子鐸字宣叔鈞字和叔俱  
有名于時宣叔為諫官諫章廟元妃李氏出細  
微不應上僭有累聖德又其兄弟恃寵納賂將  
有楊國忠之禍坐謫除名宣叔布衣還鄉里  
傳夫人臨終敕宣叔曰汝以憂國愛君故極言  
直諫天子明聖特暫有所蔽計他日必復起汝  
前事須再言勿有所顧藉也墓碑不之載故表  
出之



楊祕監釋迦出山像

自從此老出山隅  
惱亂蒼生底事無  
他日若逢楊處士  
只教畫箇涅槃圖

張代州大節一首

大節字信之五臺人天眷中進士與興陵有藩  
邸之舊愛其真淳甚倚重之歷橫海軍節度使  
咸平大興尹吏部尚書河東北路兵馬都總管  
明昌初請老特授雁門節鉞除其子嵩叟忻州

刺史以榮其歸信之好獎進士類滄州徐躋太  
原王澤大興呂造經其指授卒成大名士論以  
風監歸之嵩叟字夢弼亦第進士歷嵐潞懷三  
州節度終於集慶軍屏山謂吏事不及乃父而  
以長厚見稱子待舉臺掾選授奉御正大末從  
車駕東狩不知所終孫紹祖在東平

同新進士呂子成輩宴集狀元樓

鸚鵡新班宴杏園不妨老鶴也乘軒龍津橋上黃金榜

三見門生是狀元

趙轉運慤

三首

慤字叔通黃山先生泐之父也宋末汪彥章任  
鄆州教官叔通為學正嘗預酬唱故其詩文皆  
有源委國初登科仕至同知南京路轉運使事  
擬古

春風動地來依依燒痕青王孫行不歸離恨何時平  
翩誰家兒曉獵開紅旌彫弓插白羽怒馬懸朱纓圍合

意氣雄廝養厭庖烹人生一春草時至何足榮君看五陵樹日莫悲風生

蜀山曉發

曉發蜀山道山深人自迷殘星數徽小斜月一梳低隔舍縹車響遙林杜宇啼區區事行役何日得安栖

寒齋雪中書呈許守

剪水作花開紛紛天上來聲清偏傍竹艷冷欲欺梅積潤滋年麥餘膏丐草萊窮閭休歎息數日是春回

郭祕監長倩一首

長倩字曼卿文登人皇統丙寅經義乙科仕至  
祕書少監兼禮部郎中修起居注與施朋望王  
無競劉崑老劉無黨相友善所撰石決明傳為  
時人所稱有崑崙集傳于世子天驥

義師院鼓竹

南軒移植自西壇瘦玉亭亭十數竿得法未應輸老柏  
植根兼得近幽蘭雖無穠艷包春色自許貞心老歲寒

百草千花盡零落請君來向此中看

郭錄事用中一首

用中字仲正平陽人大定七年進士歷浮山簿  
陝州錄事卒年三十一有寂照居士集郝子玉  
毛牧達鄭仲康為之引其賦醋魚云身卧不知  
雲子白氣酣聊作木奴酸按博物志西羌仲秋  
日取鯉子不去鱗破腹以赤秣米飯鹽醋合糝  
之逾月則熟謂之秋鮓故仲正云然又賦雪云

灞橋柳絮人千里楚澤蘆花水半扉殊有詩人  
思致恨不假之以年耳

偶得

叅徧叢林懶出游指端孤月照高秋大千界裏閒窺掌  
不二門中暗點頭埽地燒香聊自遣栽花種竹儘風流  
莊蒙抵死談齊物無物齊時也合休

趙太常之傑

三首

之傑字伯英大定人本名宗傑避諱改大定十

六年進士歷西京提刑副使棣州防禦使終于  
太常卿使宋還言事云宋人文敝之極且脆弱  
不足為慮邊部為可慮也其前識如此子繪名  
進士早卒孫季卿在燕中

許道寧羣峯莫雪

道士平生林野人醉中拈出雪峯真為君療却烟霞癖  
比似青囊藥更神

題濟源龍潭寺



樹圍脩竹竹圍庵  
庵下泓然碧一潭  
極目荷花半秋色  
小橫圖上看江南

除夜

日月不肯留歲歷  
倏去畢僧坊見節  
物新正在明日夜  
半拊枕歎半百又  
加七形骸念念改  
膂力能不失經言  
男數八此去才有一健者  
未可期況乃常衰疾物情忌  
盈滿君子慎名實行矣  
安退閒吾其保終吉

趙轉運鼎一首

鼎字德新樂城人大定十六年進士喜作詩頗  
知道學屏山所許如此仕至西京路轉運使元  
日詩云拜嗟筋力隨年改飲覺屠蘇到手遲惜  
不多見也子中立字正卿第進士文譽甚著

宿來同堡

渭北洮南過却春窮邊冰雪更愁人來同驛裏題詩處  
破屋青燈一病身

田轉運特秀一首

特秀字彥實易縣人大定十九年進士仕至太  
原轉運使喜作詩為周德卿李之純所賞感興  
云散木不材寧適用虛舟無意任隨流百年身  
世槐安國千古人情夢頡頏侯賦古塏云締構百年  
人換世消沉千古鳥盤空他類此彥實所居里  
名半十行第五以五月五日生小字五兒二十  
五歲鄉府省御四試俱中第五年五十五八月  
十五日卒造物之戲人如此

五月五日生者見  
其賦集序胡國瑞

云

# 宿萬安寺

長途鞍馬倦黃塵  
喜見空山萬疊雲  
漫漫野煙迷去鳥  
蕭蕭林葉帶殘曛  
苔封老檜龍鱗起  
石礙流泉燕尾分  
夜敞松窗耿無寐  
一庭蘿影月紛紛

趙漕副文昌

一首

文昌字當時陵川人仕至京兆轉運副使嘗有  
詩云蟲聲連壞壁樹色入秋窗草香花落處山

黑雨來時頗為黃華所稱

歌扇

媚娘巧作貫珠喉  
畫扇團團半掩羞  
唱到春山小顰處  
一輪明月為花愁

路轉運忱一首

忱字子誠平郭人  
大定二十二年進士  
累遷監察御史  
終于河東北路轉運副使

秋懷

落日留虛壁秋風急戍樓高歌神鬼夜揮涕黍禾秋豪  
貴少青眼文章多白頭何時挂長劍天地一扁舟

高密州公振一首

公振字特夫正隆初進士歷南京留幕終于密  
州刺史詩有家學賦南園江鄉有翠蓋紅粧無  
俗韻綠陰青子更多情之句惜不多見也

裴氏西園

簿領沉迷倦不禁偶從名勝此幽尋竹陰疎處見潭影

人語定時聞鳥音陳迹謾留千古恨歡遊聊慰十年心  
多情一片梁園月送我垂鞭出上林

張轉運穀一首

穀字伯英臨潁人大定二十八年進士仕至河  
南路轉運使家多法書名畫古物祕玩周秦以  
來鏡至百餘枚他物稱是天性孝友與人交極  
誠款古所謂博雅君子者伯英可以當之弟穀  
字伯玉美風儀善談論氣質豪爽在之純希顏

伯仲間舉進士有聲場屋及再上不中即拂衣

去嘗自言丈夫子娶非尚主官不徒步之宰相

不屑可也宰相李公仲脩適之皆與之遊從不

敢以布衣諸生處之家既貴顯厚於奉養擊鮮

為具賓客日滿門窮晝竟夜卒以樂死嘗賦雪

云樵皮雙鳬懶漁蓑一蜩拳醉後云日日飲燕

市人人識張鬚西山晚來好飲酒不下驢賦畫

石云腹非經笥口不肉食胸中止有磊磊落落



百千萬之怪石興來茹噎快一吐將軍便欲闕  
弓射氣母忽破碎物怪紛狼籍有時醉狂頭挿  
筆寫盡人間雪色壁其顛放如此

石淙

天后離宮在崧山曲河即東坡為韓子華賦詩處也

潁水洗餘高士耳是非猶恐污人牛區區武媚何為者  
水上摩崖紀宴游

宗御史端脩

一首

端脩字平叔一字伯正汝州人大定二十二年

進士衛紹王避世宗諱改宗為姬而天下止以  
宗平叔目之好學喜名節操履端勁慕司馬溫  
公之為人自為諸生時見者必悚然敬之明昌  
中自省掾拜監察御史車駕東狩是歲大寒人  
有凍死者平叔諫止之元妃兄弟李喜兒輩干  
預朝政平叔上書以遠小人為言道陵知其為  
喜兒發詔喜兒就問卿欲朕遠小人小人為誰  
其以姓名對平叔奏小人止李喜兒兄弟耳喜

兒以聞李氏兄弟皆被切責竟以訐直貶官平叔自守愈篤是是非非議論一出於正大為朝廷所知降詔褒諭以全州節度副使卒官平叔妻死不更娶潔居二十年士論高之永寧游彥哲調汝州司候將之官問為政平叔言為政不難治心養氣而已彥哲不領明日復來云夏初入官且臨先生鄉郡請問從政而先生乃以治心養氣為言思之不能得願終教之平叔曰子

寧不知此耶治心則心正心正則不私養氣則  
氣平氣平則不暴不私不暴為政之術盡於此  
矣平叔墓碑及傳閒閒公為作稱其剛稜疾惡  
有鐵面陳了翁之風人不以過云姪孫汝作正  
大末保山棚有功入守汝州力盡城復陷兵人  
欲降之不屈而死

漫書

冷面宜教冷眼看只慙索米向長安陰崖何限枯松樹

望見屏幃盡牡丹

張戶部翰 五首

翰字林卿秀容人大定二十八年進士為人有  
蘊藉如素宦然累遷監察御史翰林直學士貞  
祐初戶部侍郎車駕南渡出為河平軍節度使  
召拜戶部尚書草創之際經費空竭雖米鹽細  
物皆倚之而辦予嘗見於戶曹邠州一書生言  
時事相與詰難凡數十條率不思而對雖反復

計度者亦自不能到信通濟之良材也宣宗旦  
暮相之會卒年五十五弟脩字飛卿承安五年  
進士同知河東北路兵馬都總管事猶子天彝  
字仲常黃裳榜登科子天任字西美近侍局副  
使死于宋州之變

贈石德固

西湖之月清無塵橘中之樂猶避秦向來所見止此耳  
渠亦豈是真知津如君眼孔乃許大萬事付之塵甑墮

兒能詩書又肯播著脚世間看踏破青巾玉帶桃李花  
日斜空望紫雲車布衣誰識隱君子一馬癯然何處家  
再過回公寺

山州風土極邊頭二十年中復此遊青鬢已隨人事改  
碧溪猶繞寺門流輕寒剪剪侵馳褐小雪霏霏入蜃樓  
為問勞生幾時了不誠長抱異鄉愁

萬寧宮朝回

宿雨初收變曉涼宮槐恰得幾花黃鵲傳喜語留鞘尾

泉打空山輟鞠場已覺雲林非俗境更從衣袖得天香  
太平朝野歡娛在不到蓮塘有底忙

奉使高麗過平州館

昨日龍泉已自奇一峰寒翠壓簷低兼并未似平州館  
屋上層巒屋下溪

金郊驛

山館蕭然爾許清二更枕簟覺秋生西窗大好吟詩處  
聽了松聲又雨聲



李好復二首

好復字仲通安喜人明昌二年進士榆次令有  
能聲入為警巡使嘗以事縛一護衛道陵有投  
鼠之喻出為歷城令終于滑州刺史

邵智夫同游南城

園林晴晝蔚如煙林外支流盡水田落日趨墟人已散  
鷺鷥飛上渡頭船

雨中與客飲

門外平橋一水分數聲  
漁唱隔溪聞暖風落絮飄香雪  
小雨沾花濕夢雲釀具未甘名  
長物詩壇聊欲張吾軍  
相逢莫惜通宵飲明日閒身不屬君

楊祕監邦基

一首

邦基字德茂大定中進士仕至祕書監禮部尚  
書文筆字畫有前輩風調世獨以其畫比李伯  
時云

墨梅

粉蝶如知合斷魂啼粧先自怨黃昏花光筆底春風老  
寂莫嶺南烟雨痕

呂陳州子羽四首

子羽字唐卿大興人大定末進士仕至陳州防  
禦使元光末為酷吏所誣以乏軍興繫獄比赦  
至唐卿自縊死朝臣有辨其冤者詔復官希顏  
為制辭云毀譽之來在仁賢而不免是非之論  
至久遠而乃公人謂唐卿於此語為無媿屏山

故人外傳呂氏自國朝以來父子昆弟凡中第者六人以六桂名其堂貞幹字周卿尤自刻苦酷嗜文書著竭石志數十萬言皆近代以來事迹幽隱譎怪詼嘲評無所不有在史館論正統獨異衆人謂國家止當承遼大忤章廟旨謫西京運幕量移北京致仕自號虎谷道人晚年感末疾又號呂跛子自作傳以見志閒閒公亦以為篤志君子也弟士安字晉卿卿雲字祥卿

子鑑字德昭皆名士唐卿其從子云

廣平道中

風色著鰲面霜華侵老須昏埃埋故驛積雪縞脩途凍  
岫新詩句寒林古畫圖夜寒孤月上天地一冰壺

宿章義廣勝寺

小邑本無事我來勞簡書路長頻問馬人靜厭烹魚鐘  
冷僧叅外燈殘客夢餘此心誰領會松月夜窗虛

至日

歲晏多風雪官閒深屋廬小詩窮則變美酒數斯疏未  
草歸田賦空翻引睡書窗明添眼力已覺日光舒

李白醉歸圖

春風醉袖玉山頽落魄長安酒肆迴忙煞中官尋不得  
沉香亭北牡丹開

趙鹽部文昌一首

文昌字公權平陽人明昌二年進士仕至遼東  
路鹽使博學好持論周常山甚愛之子觀字維

道從事史院資謹厚不忤于物閒閒許其字畫  
進進不已可到古人云

軍中寄親舊

軍中從事鬢絲垂把釣江湖與願違紅葉關河為客久  
黃花時節寄書歸霜天不盡孤雲遠秋意無聊一雁飛  
鄉社故人應念我豈知南望更依依

韓內翰玉

二首

玉字溫甫其先相人五世祖繼寧仕石晉為行

軍司馬從出帝北遷居析津曾孫知白仕遼為

中書令孚為中書門下平章事賜田盤山遂為

漁陽人曾祖錫字難老仕國朝以濟南尹致仕

溫甫明昌五年經義詞賦兩科進士入翰林為

應奉應制一日百篇文不加點又作元勲傳稱

旨道陵歎曰勲臣何幸得此家作傳耶泰和中

建言開通州路水漕渠船運至都陞兩階授同

知陝州東路轉運使事大安三年都城受圍夏



人連陷邠涇陝西安撫司檄溫甫以鳳翔總管

判官為都統府募軍旬月得萬人藉秦州場買

馬官香及鳳翔冒買馬七百寶雞埋沒官鐵他

州郡弓弩數千以給軍出屯華亭與夏人戰敗

之獲牛馬千餘時夏兵五萬方圍平涼又戰于

北原夏人疑大軍至是夜解去當路者忌其功

驛奏溫甫與夏寇有謀朝廷疑之使使者授溫

甫河平軍節度副使且覘其軍先是華州李公

直以都城隔絕謀舉兵入援而溫甫恃其軍為  
可用亦欲為勤王之舉乃傳檄州郡云事推其  
本禍有所基始自賊臣貪容姦賂繼緣二帥貪  
錮威權既止夏臺之師旋致會河之敗又云齊  
魏以高壘為能堅蒲絳以穿空為得計裹糧坐  
費盡膏血於生民棄甲復來竭資儲于國計要  
權力而望形勢連歲月而守妻孥又云命令不  
至京師柰何眊眊四集之師懸懸半歲之上人

誰無死有臣子之當然事至于今忍君親之弗  
顧勿謂百年身後虛名一聽史臣只如今日目  
前何顏以居人世公直一軍行有日矣將佐違  
約國朝人不從者輒以軍法從事京兆統軍  
便謂公直據華州反遣都統楊珪襲取之皆置  
極刑公直曾為書約溫甫溫甫不預知其書乃

為安撫所得

公直書三一與京兆宣撫一與溫甫一與楊珪故京兆軍得因書襲

華州及使者覘溫甫軍且疑預公直之謀即實其

罪溫甫赴官道出華州被囚死于郡學臨終書  
二詩壁間士論冤之溫甫先賦怪松云昂藏殊  
未展偃僂旋自縮惜爾雲外姿耐此胯下辱又  
云木高衆必摧地厚敢不跼河中皆汎汎澗底  
自鬱鬱未幾被禍人以為讖云子不疑字居之  
小字錦郎以父死非罪擔不祿仕丙申之夏過  
予冠氏出其父臨命時手書云此去冥路吾心  
皎然剛直之氣必不下沈兒可無慮世亂時艱

努力自護幽明雖異寧不見爾予為之惻然

臨終二詩

客自朝那戍東過古鄭原衰年會凶運奇禍發流言白骨將為土青蠅且在樊仰呼天外恨沉思地中冤母喪半途鬼兒孤千里冤此心終不滅有路訴天閭

又

天下無雙士軍中有一韓才名兩相累世道一何難旅次窮冬莫因孤永夜寒身亡家亦破巢覆卵寧完矍鑠

鞍仍在驚呼鋏屢彈丈夫忠義耳無惜感歌還

王都運擴一首

擴字克之永平人明昌五年進士累遷同知德州防禦使事山東饑詔馳驛赴官且以賑貸事付之時棣州饑尤甚而不在發粟之數充之擅開倉救之朝廷不之罪也泰和七年夏旱充之以監察御史受詔審冤因為同列言往時審冤一切以末減為事至殺人者之罪亦貫出之地

下之寬當誰理之乎使還言勅設三司不便大  
畧言三司之設特以刻剝為事大定間一曹望  
之為戶部天下倉廩府庫皆實百姓無愁怨之  
聲存乎其人不在改官稱也今三司官皆戶部  
舊員掾屬亦戶曹舊吏豈有愚於戶部而智于  
三司者乞復戶部之舊無駭民聽可也崇慶初  
遷河東北路按察僉事上書言時病四一將不  
知兵二兵不可用三事不素定四用人違其長

貞祐二年太原受兵充之之功為多最後權陝  
西西路轉運使行六部尚書前政太原喬世權  
子實燕人趙伯成子文號為稱職充之表表自  
見雖處細務亦有法掾屬奔走從事無敢後者  
評者為子實寬緩欲為不忍欺子文慎重欲為  
不能欺皆未必能然獨王公之不敢欺為有徵  
云年六十三致仕卒子元慶字善甫歸德行六  
部郎中次子元亨



題神霄宮清心軒

紛紛百慮自心生方寸清來百慮平  
未了此心私自笑更憂時世欲澄清

趙吏部伯成 三首

伯成字子文宛平人明昌五年經義詞賦兩科  
進士博通書傳有真積之力性沉厚言必中理  
從在太學日人以趙骨鯁目之累遷侍御史拜  
中丞陝西西路轉運使靜難軍節度使哀宗即

位召為吏部尚書坐為飛語所中罷官卒于松  
山中潞人宋文之說其臨終甚明了也

蠟梅二首

凍蕾含香蠟點勻古來幽谷有佳人詩家只怨和羹晚  
不道紅梅別是春

又

冷艷疎香寂莫濱欲持何物向時人東風自是清狂手  
辦作竹籬茅舍春

元弟以所業見投賦詩為贈

耆舊隔存歿為君重歎嗟人門得嵇紹文賦見張華夙  
有凌雲筆方乘犯斗槎忘年即吾友未可論通家

梁錄事仲新一首

仲新字良輔朝城人明昌五年進士初試仙掌  
承露詩主司以為擅場用是知名卒于許州錄  
事

江天莫雪圖

南雪不到地霏霏滿竹樓沙河燈市裏春在木綿裘

盧待制元一首

元字子達玉田人父啓臣字雲叔第進士仕官  
亦達自號湏水先生和趙元發劉師魯葛藤韻  
云乳兔生長角麈湯結厚冰木終成假佛髮不  
礙真僧莫認指為月須明火是燈拈花微笑處  
只記老胡曾子達幼而敏惠年未二十試于長  
安為策論魁擢第後又中策魁明昌初章廟設

宏詞科命公卿舉所知子達與郭敞周詢張復  
亨就試凡七日並中選遂入翰苑累遷至待制  
二兄長庸弟曾名進士又俱擢高第時人以燕  
山竇氏比之屏山故人外傳云爾子安字希謝  
翔字仲升仲升正大末登科

閒詠

天近蒼龍闕居連白馬堂松聲得鄰舍山色出宮牆  
巷陋輪蹄少庭閒日月長九衢紅霧裏亦有白雲鄉

太常卿石抹世勣一首

世勣字晉卿承安中進士終于禮部尚書子嵩  
字企隆應奉翰林文字父子皆死蔡州之難

紙鳶

鴟鳶鴟誰雌雄假手成形本自同果物戲人人戲物  
為風乘我我乘風扶搖漫擬層霄上高下都歸半紙中  
兒輩呶呶方佇目豈知天外有冥鴻

范滑州中一首

中字極之大興人承安中進士累官京西路司  
農少卿滑州刺史好賢樂善有前輩風流貞祐  
中高琪當國專以威刑肅物士大夫被摭撫者  
笞辱與徒隸等醫家以酒下地龍散投以蠟丸  
則受杖者失痛覺此方大行於時極之有戲云  
嚼蠟誰知味最長一杯卯酒地龍香年來紙價  
長安貴不重新詩重藥方時人傳以為笑極之  
嗜讀書一以資于詩詩亦往往可傳壬辰卒于

京師年五十七

贈韶山退堂聰和尚

郎當舞袖少年場  
綠索機關似郭郎  
今日棚前閒袖手  
却教鼓笛看人忙

趙禮部思文六首

思文字廷玉永平人明昌五年進士貞祐中陷  
沒都城間關南渡遂為朝廷所知歷虢州刺史  
汝州防禦使金安集慶兩軍節度使召拜禮部



尚書壬辰卒官為人誠實樂易自少日有君子  
長者之目南狩以後趙吏部子文楊禮部之美  
趙禮部周臣陳司諫正叔與庭玉皆完人終始  
無玷缺者也弟庭珪同榜登科三子敬叔介叔  
方叔今居鄉里

試院中呈同官崔伯善李順之

睡起松陰鳥雀譁忽驚霜果墮檐牙簡書迫促全疎酒  
眼力眊昏只費茶不學道人食柏葉却隨舉子踏槐花

提衡文字非吾事崔李風流有故家

侯相浪溪歲寒堂

靜中臺榭隔紅塵水色山光日日新不用沿溪種松竹  
主人元是歲寒人

捕蝗感草蟲有作二首

雖是形模不苦爭汝能傷稼我能鳴誰知竟有長平禍  
玉石填來共一坑

又

草蟲悲咽不能言  
亂逐螟蝗瘞古原  
水底癡龍正貪睡

甕中蝎虎更銜冤

二詩疑圓城中作  
觀者可以意推之

### 嵩山承天谷又云逍遙谷

煙霞直上逍遙谷  
路轉山腰咫尺迷  
已覺洞天分聖境

更疑石蹬是仙梯  
霜添紅葉黃花好  
天與金壺玉柱齊

兩峯名  
醉倚西風正南望  
莫雲烟草一時低

### 弔同年楊禮部之美

海內文章選人中  
道德師爭教衰病  
足不到鳳凰池

李坊州芳一首

芳字執剛大興人承安二年進士歷乾坊兩州  
刺史同知都轉運使事為人敬賢下士款曲周  
至聞人一善極口稱道士論以此歸之又精于  
吏事累以廉能進秩正大末致仕歿於洛陽之  
睢

留別

祿食媿踰量智困念歸愚符竹恒為累幸及引年初驅

馬國西門初服返田廬金閨富才彥絕足駛高衢眷我  
謝朝蹟冠蓋寵歸途歸途豈不榮顧瞻亦踟躕煌煌丹  
山鳳覽德萃清都行人得棲止老鶴青天孤石樓俯清  
伊旁有幽人居儻逢經過便山水足相娛

劉鄆縣昂三首

昂字次霄濟南人承安五年進士調鄆縣令劉  
光甫曾為同官稱次霄高材博學詩時有佳句  
云

零口早行

馬上兀殘夢沉沉天向晨行雲如妒月古道不逢人野  
曠畔聲遠山高露氣新哦詩無好語聊爾一吟呻

讀三國志二首

虎視鯨吞卒未休一時人物盡風流婦翁正得黃承彥  
兒子當如孫仲謀乳臭蒙孫真寄坐齒寒鄰國莫分憂  
阿瞞狐媚無多罪誰作桓文得到頭

又

泣漢遺黎血未乾  
繁昌新築受終壇  
天球寶鼎私臧獲  
坎井幻堂局鳳鸞  
地易主賓窮赤壁  
勢成螳雀事烏丸  
陳言衮衮令人厭  
枉就輸基覆舊槃

錦峰王仲元

三首

仲元字清卿平陰人  
承安中進士以能書名天  
下歷京兆轉運司幕官子公茂今在雲中

雪中同周臣內翰賦二首

天上瑞花散不收  
溫溫叶氣浹皇州  
橫溪月澹梅宜臘

平野風閒麥有秋，清興雅高東武會。  
孤吟誰似灞陵游？西山玉立三千丈，  
好句都輸趙倚樓。

雪

初稀時拂拂，稍密自紛紛。  
老樹曉迷月，瘦峯寒帖雲。  
色從空際得，聲向靜中聞。  
客枕清無夢，哦詩徹夜分。

贈青柯平隱者

太華神明觀，青柯小有天。  
大哉霄壤內，無此弟昆賢。  
齊物三千行，棲雲二百年。  
初平初起後，又得兩臞仙。



盧宜陽洵一首

洵字仁甫高平人李承旨致美見所作上梁文  
勉使就舉六十一歲呂造榜登科歷河南府教  
授河陽丞宜陽令致仕後居伊陽年八十三卒  
仁甫有詩學以鞏原及赤壁圖詩著名招飲云  
南園仙杏猩紅破北渚官醪玉汗醇已約尊前  
成二老全勝月下作三人

白溝

白沙清淺不容舟  
遼宋封疆限此溝  
到了山河無定主  
碧波依舊只東流

刁涇州白 三首

白字晉卿信都人  
呂造榜乙科歷涇州幕官入  
補省掾卒作詩極致力樂府  
尤有風調今散失  
不復見矣

渭水

渭水秋天白  
驪山晚照紅  
行人迷古道  
老馬識新豐  
霜

雪滿歸鬢乾坤猶轉蓬愁來成獨酌醉袖障西風

物質

物質方圓定營營止自疲鶴鳬傷斷續鵬鷗失高卑巧  
宦多成拙徐行未必遲可憐箏上雁來往聽人移

送花

縱橫詩酒少年曾老矣追憶謝不能種出好花無用處  
東鄰乞與坐禪僧

劉戶部光謙一首

光謙字達卿潘州人父澤字潤之為部掾斷獄  
有陰德劉之昂與之酬唱其詩有云侯門舊說  
炎如火陋巷今猶冷似冰半夜杯槃長袖舞白  
頭書冊短檠燈用是人不敢以府史待之達卿  
泰和三年進士資幹局處事詳雅為朝廷所知  
累官司農少卿病瘡許州宣宗勅國醫診視之  
卒年五十六好問為舉子時識於登封相得甚  
歡尊酒談笑有味使人不能忘也

寄陳正叔雷希顏

東南形勝古徐州人物休評第幾流  
落落陳雷天下士故應連榻卧黃樓

毛提舉端卿一首

端卿字飛卿彭城人父矩桓州軍事判官歿王  
事飛卿二十歲始知讀書游學齊魯間備極艱  
苦飢凍疾病不以廢業凡十年以經義魁東平  
泰和三年擢第累遷提舉榷貨司戶部員外郎

性剛明疾惡過甚坐與監察御史相可否為所  
中傷降鄭州司候改孟津丞將復用矣會卒子  
思適今居東平

題崞縣郝子玉此君軒

桂林名姓一枝新萬竹青青德有鄰渭上風煙分別派  
山陽詩酒屬閒人心期已到冰霜窟眼界不知花柳塵  
萱背從今看輝映嫩香新粉四時春

康司農錫一首

錫字伯祿寧晉人其祖嘗與兄弟分財他田宅  
無所問止取南中生口十餘人縱為民而已以  
故家獨貧父奕為里胥性純篤縣令者倚之以  
納賄及令為御史所劾奕自念言直則令被罪  
終世不齒渠官長而我以事證之何以立於世  
乃自縊而死令竟以無迹可尋獲免伯祿既養  
于外祖田氏田氏見伯祿骨骼異他兒謂當有  
望使之應童子舉飲食卧起躬自調護備極勞

苦得解赴都一日日莫行茭葦中懼為同行所

遺至背負伯祿而行及長師柏鄉王翰周輔東

脩不能備周輔與諸公共賙給之黃裳榜擢第

歷櫟陽簿警巡判官辟彭原令補省掾考滿遷

開封府判官拜監察御史言宰相侯摯師安石

非相材提點近侍局宗室安之聲勢焰焰請託

公行不可使久在禁近朝議偉之選授右司都

事京南路司農丞破上蔡諸縣群不逞把持之



黨以河中治中充行六部郎中從軍城陷投水  
死伯祿孝于母友于其弟有恩義于朋友從政  
則死心以奉公為民古所謂公家之利知無不  
為者惟伯祿為然同年生如雷希顏冀京父宋  
飛卿之等名士數十人世以比唐日龍虎榜至  
論氣質尚以伯祿為稱首云

按部南陽有贈

魯山佳政霑鄰邑白水歡謠見路人縣務清談君自了

農郊夙駕我何勤  
星河直上冰輪轉  
桃李前頭玉樹春  
海寓疲民望他日  
草堂那得遽移文

張戶部德直一首

德直字伯直平陽人叔祖邦彥字彥才張楫榜  
登科以當川令致仕有松堂集行于世嘗有詩  
云青山澹澹水溶溶盡出蒼祇點化工無限燒  
痕渾綠染可憐喬木待春風父迪祿字仲英明  
昌初進士歷岐山上黨二縣令卒于省掾伯直

貞祐三年進士釋褐新平簿辟藍田令秩滿父  
老詣行臺留再任去之日為立生祠移沔池通  
許召補省掾選授右警巡使終于同知武勝軍  
節度使事子城今居永寧

叔能見過

度嶺千峯潤泂溪一徑微山寒花發晚村迥客來稀強  
飲酬佳節悲歌送夕暉平生愛歡聚衰病與心違

馮辰一首

辰字駕之臨潼人貞祐三年進士辟涇陽令九  
歲知作詩

雨後

時年十三

東風花外錦鳩啼喚起西山雨一犁綠滿蔬畦人不到  
桔槔閒立夕陽低

王世昌 二首

世昌字慶長寧州人貞祐三年同進士出身以  
信都丞致仕

過華州

拔地三峰冷翠微，落嵒飛瀑噴珠璣。  
吟鞭落托騎驢過，戰刃韜藏牧馬歸。  
十丈玉蓮秋不謝，半楞掌月晝還飛。  
地靈人傑無遺逸，未分蟠螭老布衣。

方城東寺海棠

苦苣如針草有芒，桃花輕薄絮顛狂。  
少陵例有詩沾丐，只枉無言到海棠。

李宜陽過庭一首

過庭字庭訓武亭人貞祐二年進士歷宜陽永  
寧滎陽三縣令所去見思入為右曹掾斷獄寬  
平當妖賊李亨首坐所註誤數百人皆從輕法  
正大中擢右三部司正終於昌武軍節度副使  
少日從太原王正之學故詩文皆有可觀人初  
與交者皆不能合久之知其為淳質長厚人也  
壬寅四月暴卒於東平子萼字華甫

讀公孫弘傳

古來好客數平津  
我道真龍未必真  
一箇仲舒容不得  
不知開閣為何人

田錫二首

錫字永錫宛平人興定五年進士調新蔡主簿  
閒居南陽驥立山下資豪爽自少日有聲場屋  
間作詩甚多弔蘇墳一篇有英靈還却眉山秀  
依舊東風草木天之句世間傳之

牧牛圖

干戈擾擾徧中州  
挽粟車行似水流  
何日承平如畫裏  
短蓑長笛一川秋

故縣別業

九折驅車夢易驚  
一廛老計喜初成  
園蔬不借將軍地  
宅券何勞宰相名  
山入平簷供遠翠  
水環釣石得深清  
漫郎聲叟琦子誰  
悟他生與此生

張介一首

介字介夫彭城人  
正大元年經義第  
一人歷鞏



穀熟二縣令幼有賦聲為人有蘊藉嘗贈詩人  
楊叔能末章云我貧自救如沃焦君來過我亦  
何聊為君欲寫貧士歎才思殊減荒村謠楊初  
以荒村謠得名故云

讀天寶遺事

不但昨非今亦非上皇騎馬淚沾衣曲江死後無忠諫  
却憶詞人秋雁飛

龐漢一首

漢字茂弘平晉人正大末年進士沉毅有志節  
待次內鄉北山兵亂遇害

終南谿

冷雲低壓萬長楊十頃秋陰鎖北堂門外兵塵漲秦楚  
水邊烟景似湖湘荷翻山雨僧窓晚竹汎溪風客枕涼  
早晚初平遂真隱遶陂閒牧石頭羊

宋景蕭二首

景蕭字望之濟川族孫正大六年進士辟令泰

安未赴遭亂望之於劉景玄為外兄故其詩頗  
獲沾丐嘗有荒山銷盡古今魂之句詩家稱焉  
河陰望河朔感寓一首

南來邊報日駸駸思禹亭高淚滿襟野燒為誰留白草  
荒城空自隔疎林雁聲不斷天連水山色無情古又今  
離合興亡只如此往年爭識少陵心

春雪用上官明之韻

啁啁春虫鬧撲窗地爐茶鼎蚓聲長詩中有味清於酒

金 夕 日 月 合 三  
卷八  
只欠冰稍數點香

李警院天翼 三首

天翼字輔之固安人貞祐二年進士歷滎陽長  
社開封三縣令所在有治聲遷右警巡使汴梁  
既下僑寓聊城落薄失次無以為資辟濟南漕  
司從事方鑿圓枘了不與世合衆口媒孽竟罹  
非命輔之材具甚美且有志於學與人交款曲  
周密久而愈厚死之日天下識與不識皆為流

涕予謂天道悠遠良不可知而天理之在人心者亦自不泯也

還家三首

幽花雜草滿城頭  
華屋唯殘土一丘  
鄉社舊人何處在  
語音強半是陳州

又

牡丹樹下影堂前  
幾醉春風穀雨天  
二十六年渾一夢  
堂空樹老我華顛

又

殊音異服不相親獨倚荒城淚滿巾祇有青山淡相對  
似憐我是此鄉人

張叅議澄四首

澄字之純別字仲經本出遼東烏惹族國初遷  
之隆安祖黃縣府君移官洛水因家焉之純早  
孤能自樹立避地洛西率資無旬日計而泰然  
以閉戶讀書為業嘗從辛敬之趙宜之講學故

詩文皆有律度兵後居東平詩名藉甚如云齊  
客計窮思蹈海杞人癡絕謾憂天壞壁粘蝸艱  
國步荒池漂蟻失軍容此類甚多

### 積雨

積雨生頑痺新晴意自怡幽花依小徑野蔓媚疎籬髮  
少從梳懶年衰與杖宜腐儒慙用拙糲食復何辭

### 和林秋日感懷寄張丈御史二首

塞草枯黃秋未殘北風裘褐日生寒田園政憶遂初賦

冰雪莫吟行路難囊穎露錐徒自苦蒯緱有劍祗空彈  
南窓明暖無塵到慙愧高人老鶻冠

又

別家六見月牙新萬里風霜老病身塊坐羶廬心悄悄  
遠懷茅屋夢頻頻瓜田無取終成謗市虎相傳久是真  
鄉國歸程應歲莫火爐煨栗話情親

輓馬圖

飛塹築城力亦優不應伏櫪便垂頭而今世上無良樂



兀兀黃塵輒得休

劉神童微一首

微字伯祥益都人七歲能文道陵召入宮賦鳳  
皇來儀二首稱旨賜經童出身係籍太學後登  
貞祐二年第

春柳應制得城字

翠細圓勻綠線輕著行排立弄新晴更看三月春風裏  
散作飛花滿鳳城

郭宣道一首

宣道字德明邢州人系出衣冠家人物楚楚而  
有老成之風貞祐中客南陽名士定興張履坦  
之罷鄧州觀察閒居此縣之石橋見德明愛之  
招致門下飲食教督委曲周備遂有聲場屋間  
正大末沒兵中

送同舍張耀卿補掾中臺

摩雲頭角看昂藏意外升沉豈易量取士皆知有科舉

進身初不在文章關心雁塔功名晚試手烏臺歲月忙  
此去一官先有路獨憐燈火夜窗涼

張仲宣二首

仲宣字利夫相州人舉進士有聲子柔字子友  
今在林慮

下第

主司頭腦舊冬烘更著書郎骨相窮曉賦得官何足道  
直須遮馬困吳融



戲題石鹿蜂猴畫卷

橫槊將軍馬足塵判花學士筆頭春功名果屬丹青手  
造物如何戲得人

胡汲一首

汲字直卿衛州人少有賦聲與新鄭傅伯祥呂  
鵬舉相友善貌寢陋而滑稽無窮時命不偶竟  
窮悴而死

失題

休笑參軍靴不襪休嗟門客食無魚燕鴻來去端誰使  
鵬鷖逍遙本自如潦倒淵明三徑菊荒唐惠子五車書  
古人淡裏求真味身外紛華不羨渠

王脩齡 一首

脩齡字紹先同州人詩有得意好花開早落喚  
愁芳草燒還生閒閒愛而戲之目為癡仙人


黃葉行送祖唐臣歸拓縣

送君黃葉山黃葉紛不埽上有蕭蕭之風樹下有漫漫

之衰草山中黃葉行復青髀肉一消人自老酒盡意不  
盡執手臨古道古道連延走錦襄錦襄日莫浮雲翔一  
燈孤館相思處寒鴈一聲秋夜長



中州集卷八



總校官庶吉士臣侍朝

校對官庶吉士臣陳墉

謄錄貢生臣張健